

Rapòrt Resumí

Resúmen, konklushon i rekomendashon

Resúmen

Tur aña, gobièrnu ta duna aporte finansiero den forma di subsidio na diferente instansia ku ta duna servisio ku ta kai bou di e tareanan di gobièrnu. Den e añanan ekonómiko 2013 te ku 2015, gobièrnu a subsidiá strukturalmente 74 instansia ku na fin di 2017 ainda tabata risibí subsidio. Na tur, a duna e instansianan akí 144 subsidio, na un balor total di NAf 380.619.340.

Komo dunadó di subsidio, gobièrnu tin ku supervisá si e instansianan subsidiá ta traha ku e supsidionan akí na un manera responsabel. E tarea di supervishon akí ta fihá den Ordenansa di Subsidio. Mester vigilá si ta pa e aktividatnan palabrá e instansianan ta usa e subsidio ku nan ta risibí. Pa por ehekutá e aktividatnan ei, e instansianan mester ta finansieramente sano.

Pa kumpli ku nos tarea komo Kontraloria General di Kòrsou (di awor padilanti: Kontraloria), nos a investigá situashon finansiero di e instansianan subsidiá i e manera ku gobièrnu ta manehá e riesgonan enbolbí. A investigá 61 di e instansianan menshoná anteriormente, ya ku tin 13 instansia ku nos no a risibí nan kuenta anual for di e ministerionan. E instansianan akí ta aparesé den tabèl 3 na página 15 di e rapòrt. Ademas, tin un otro instansia ku nos no por a investigá tur aspekto di dje debí ku su kuenta anual no tabata kompleto.

Pa loke ta trata e instansianan ku mester tin un informe di kontrol di accountant huntu ku nan kuenta anual pasobra nan suma di subsidio ta riba sierto montante, a sali na kla ku mayoria (61%) a kumpli ku esei. E kuantanan annual ku no tin un informe di kontrol di accountant huntu, no ta duna e garantia ku e sifranan den dje ta real. P'esei mes, pa nos investigashon, nos a usa e sifranan akí solamente komo un indikashon.

Konklushon

Kontraloria a konkluí ku komo e ministerionan konserní no ta disponé di kuenta anual di tur e instansianan i/òf pasobra no tin informe di kontrol di accountant (aprobandu e

kontenido) di algun di e kuentanan anual, nan no tabata den posishon pa supervisá e instansianan akí debidamente. Pa e mesun motibu, e ministerionan no tabata den posishon pa identifiká riesgo ku por pone ku e instansianan subsidiá lo usa e subsidio risibí, na otro manera ku no ta pa entregá e servisionan palabrá.

Pa loke ta trata situashon finansiero di e instansianan investigá, Kontraloria ta konkluí ku pa fin di 2015, diferente di e instansianan no tabata kumpli ku e normanan di likides i solvensia. Den e tabèl akibou por mira esei.

	Norma	Alarmantemente bou di norma	Tin ku vigilá	Sano	Deskonosí
Likides	> 1,5	15 (20%)	12 (16%)	33 (45%)	14 (19%)
Solvensia	≥ 25%	17 (23%)	-	43 (58%)	14 (19%)
Likides i solvensia		16 (22%)			

A sali na kla ku e instansianan no tin likides suficiente i ku p'esei nan no ta sufisientemente kapas pa kumpli ku nan kompromisonan direkto (di korto plaso). Ta 45% so di e instansianan investigá tabatin suficiente likides na fin di 2015. Di e sobrá 55%, a konstatá ku 36% no tabatin suficiente likides pa paga nan debenan di korto plaso. Di e 19% ku a sobra, nos no a haña informashon. Meskos ta konta pa pago di debe di largu plaso. Tabatin 43 instansia (58%) ku un situashon di solvensia ku no ta sano i 17 instansia (23%) ku un situashon di solvensia alarmante. Tabatin 16 instansia ku tantu nan situashon di likides komo di solvensia tabata alarmante.

Mayoria di e instansianan (58%) a akumulá debe haltu. Ta trata akí di debe di retenshon di impuesto i prima sosial no pagá na tempu. Pa fin di 2015, e saldo habrí di impuesto i prima sosial tabata NAF 13.973.377.

E sifranan anual ta mostra ku pa loke ta trata 67% di e instansianan, mas ku 50% di nan entrada ta konsistí di subsidio di gobièrnu. Esei ta nifiká ku si gobièrnu baha nan suma di subsidio, esei lo tin konsekuensia direkto pa situashon finansiero di e instansianan akí. Ademas, e instansianan ku debe haltu ta sera tur aña ku pèrdida, òf tur aña nan resultado operashonal ta keda baha. Na fin di 2015, e instansianan akí a bolbe sera aña ku resultado negativo. E tabèl ku tin akibou ta duna un bista di esei.

Kriterio	Situashon alarmante			Situashon sano	Deskonosí
Debe	Instansia ku debe na fin di 2015 43 (58%)	Debe di impuesto i prima sosial 13.973.377	Instansia ku debe haltu > 50.000 22 (51% di e 43 instansianan)	Instansia ku debe abou òf sin debe 17 (23%)	Deskonosí 14 (19%)
Dependencia finansiero	Ta dependé kompletamente di supsidio 10 (14%)	Mas ku 75% di entrada ta dependé di supsidio 26 (35%)	Entre 50 i 75% dependiente di supsidio 13 (18%)	Ménos ku 50% dependiente di supsidio 11 (14%)	Deskonosí 14 (19%)
Resultado di operashon	Resultado negativo 2013/2014 34 (47%)	Resultado negativo na fin di 2015 26 (35%)	Resultado di 2015 ta deskonosí 9 (12%)	Resultado positivo 25 (34%)	Deskonosí 14 (19%)

E análisis total di situashon finansiero di e instansianan subsidiá a saka na kla ku na fin di 2015, diesdos di e instansianan tabata den un situashon finansiero alarmante. E datonan finansiero di e diesdos instansianan akí ta den e tabèl akibou.

Nr	Ministerionan	Instansia	Norma di likides na fin di 2015	Norma di solvensia na fin di 2015	Total di debe na fin di 2015	Dependiente di supsidio	Resultado operacional	Supsidio total den NAF.
1	Desaroyo Ekonómiko	CUINTI	0,97	11%	49.861	94%	(51.918)	1.985.932,00
2	Desaroyo Ekonómiko	FUGAR	0,14	-286%	Onbekend	70%	(982.801)	1.197.500,00
3	Salubridat, Medio Ambiente i Naturalesa	SOB	0,12	-488%	835.651	97%	454.822	10.131.744,00
4	Salubridat, Medio Ambiente i Naturalesa	FPESOL	0,05	-460%	6.602.556	80%	(579.371)	10.128.896,00
5	Salubridat, Medio Ambiente i Naturalesa	FPK	0,11	-226%	233.096	40%	(57.339)	1.402.500,00
6	Hustisia	SSHC	0,26	-58%	98.964	100%	(28.332)	1.037.700,00
7	Enseñansa, Siensia, Kultura i Deporte	CSOF	0,62	-22%	3.728	34%	(71.405)	1.511.716,00
8	Enseñansa, Siensia, Kultura i Deporte	FUKAKU	0,97	11%	464.388	95%	1.247	10.904.191,00
9	Enseñansa, Siensia, Kultura i Deporte	SEB	0,52	-40%	66.306	31%	(49.593)	776.231,00
10	Enseñansa, Siensia, Kultura i Deporte	FUPAFO	0,07	-74%	Onbekend	84%	(1.108.149)	9.755.757,00
11	Desaroyo Sosial Labor i Bienestar	SBRO	0,26	-227%	3.382.599	61%	(595.455)	30.485.221,00
12	Desaroyo Sosial Labor i Bienestar	SMCCM	1,11	6%	356.526	67%	(221.604)	3.023.840,00
				Totaal	12.093.675			79.317.388,00
					16.156.584			
					28.250.259			

* Tin un remarke tokante kontinuidat den e deklarashon di akountant

A sali na kla ku na fin di 2015, e instansianan akí no tabatin suficiente likides ni suficiente solvensia. E efekto di nan situashon finansiero prekario ta keda reflehá den e nivel haltu di debe ku nan tin. Na tur, na fin di 2015, e instansianan akí a akumulá un debe di Naf 12.093.675 na impuesto i prima sosial. Tin dos instansia ku nos no a risibí nan kuenta anual di 2015. Na fin di 2014, e dos instansianan akí tabatin Naf 273.687 i Naf 15.882.897 na debe respektivamente. Si debe di e instansianan akí a keda meskos, esei lo nifiká ku na fin di 2015, e diesdos instansianan tabatin un debe total di Naf 28.250.259. Tambe a sali na kla ku mayor parti di entrada di e instansianan akí a konsistí di supsidio di gobièrnu. Ademas, kasi tur e instansianan tabatin un resultado di operashon negativo na fin di 2015; algun di nan tabatin basta aña kaba (for di 2013) ta lucha ku resultado negativo. Tin tres di e instansianan ku e accountant a hasi un komentario tokante nan kontinuidat den e informe di kontrol.

FUPAFO ta e úniko instansia serka kua gobièrnu a tuma e medida di terminá e relashon di supsidio debí na e instansia su situashon finansiero alarmante. Gobièrnu ke bai usa otro medio pa ofresé e servisionan di e instansia akí. Komo resultado di e desaroyo akí, ainda no tin klaridat te na ki grado por sigui garantisá e servisio na e grupo ku mester risibí.

Rekomendashon

Kontraloria ta rekomendá Parlamento eksigí pa e ministernan duna kuenta tokante lo siguiente:

1. E echo ku falta kuenta anual di algun di e instansianan;
2. E echo ku a duna supsidio apesar ku e instansianan en kuestion no a entregá nan kuenta anual;
3. E estado di debe di e instansianan;
4. Ki medida gobièrnu ta bai tuma pa e servisionan ku gobièrnu tin ku garantisá no kore peliger komo resultado di deterioro di situashon finansiero di e instansianan;
5. Aplikashon di análisis di riesgo i supervishon di e servisionan ku e instansianan ta brinda;
6. Formulashon di un maneho di supsidio; i
7. E informenan na Parlamento riba efektivitat di e supsidionan otorgá.

Na página 37 di e rapòrt, ta elaborá mas aleu riba e rekomendashonnan akí.

Dia 19 di aprel 2018, a presentá konsepto di e rapòrt na e ministerionan menshoná den dje, pa e proseso di skucha tur dos banda ('wederhoor') por tuma lugá, i dia 8 di yüni 2018 a present'é na e ministernan ku e ministerionan ta kai bou di dje. Nos a risibí reakshon di Sekretario General (di awor padilanti: SG) di ministerio di Asuntunan General i di ministerio di Hustisia. E úniko minister ku nos a risibí reakshon di dje ta minister di Enseñansa, Siensia, Kultura i Deporte (OWCS). E reakshonnan relevante di SG di e ministerionan menshoná i di e minister di OWCS ta inkluí den e rapòrt.